

ABC mahu anggota amal pendekatan ASEAN minus X

Kelab Perniagaan ASEAN (ABC) berpendapat halangan bukan tarif masih boleh dimansuhkan walaupun tanpa penyertaan semua negara anggota ASEAN.

Presidennya, Tan Sri Dr Munir Majid, berkata langkah yang hanya disertai oleh negara ASEAN tertentu (ASEAN minus X) harus membuktikan manfaat pemansuhan halangan bukan tarif bagi menarik negara ASEAN lain menyertai pasukan itu pada masa akan datang.

"Negara anggota ASEAN perlu mengamalkan pendekatan ASEAN minus X dalam

menangani isu membabitkan halangan tarif," katanya pada pelancaran Laporan Memansuhkan Halangan (LTB) 2015, yang berlangsung sempena Mesyuarat Menteri-Menteri Ekonomi ASEAN (AEM) Ke-47 di Kuala Lumpur, semalam.

Laporan yang dilaksanakan oleh ABC dan CIMB ASEAN Research Institute (CARI) itu dilancarkan Menteri Perdagangan Antarabangsa dan Industri (MITI),

Datuk Seri Mustapa Mohamed.

Munir berkata, ASEAN minus X tidak perlu menunggu semua 10 anggotanya bersetuju ke atas setiap isu sebelum ia boleh dilaksanakan, memandangkan banyak lagi

kekangan yang menghalang negara tertentu pada ketika itu.

"Tidak perlu menunggu semua 10 negara bersetuju untuk itu. Jika dalam kalangan negara anggota bersedia, kita boleh melakukannya," katanya.

Cadangan ABC

Mengenai laporan LTB 2015, Munir berkata, ABC memutuskan cadangan pelaksanaan pemansuhan langkah bukan tarif bagi empat sektor iaitu penerbangan, runcit, makanan pertanian dan logistik dalam tempoh tiga bulan.

"Kita mendapati antara masalah utama yang menghalang pertumbuhan e-dagang ialah e-pembayaran kerana setiap negara mempunyai sistem masing-masing yang mana menyukarkan negara lain menembusi sistem itu bagi mendapatkan penjelasan dan pembayaran.

"Kita boleh mencuba menyelesaikan masalah e-pembayaran menggunakan asas ASEAN tertentu kerana kita tidak dapat melaksanakannya secara menyeluruh di rantau ini atau memaksa setiap negara ASEAN untuk turut serta," katanya.



“ASEAN minus X tidak perlu menunggu semua 10 anggotanya bersetuju ke atas setiap isu sebelum ia boleh dilaksanakan”

Munir Majid,
Presiden ABC